

claire, nette, pure & blanche. Voicy la figure du Nil qui se voit aujourdhuy à Rome, & est descrite par Philostrate, non toutesfois que sa description conuienne totalement à ce Colosse & belle statue qui est à Rome. Le Nil est representé par vn grand vieillard à la barbe longue, ayant le chapeau de fueillage en teste, tenant de la main gauche vn cornet d'abondance plein de toutes sortes de fleurs & de fruits. Il est à demi couché, & s'appuye du coude sur ce montre qui est du vulgaire nommé Sphinx, assez mal proprement & non sans erreur, encore qu'Ælian l'ait escrit. Car le monstre fabuleux de Thebes, appelé Sphinx, est tout autre & autrement descrit, comme nous dirons cy apres parlans en nos graueures du cachet d'Auguste l'Empereur. Cet animal d'oc sur lequel est appuyé le Nil, a la teste, la coiffure, le visage d'une pucelle, & le demeurant du corps semblable au Lyon. Et parainli ne peut estre du genre des singes ou magots, qui sont nommez Sphinges, desquels ont escrit Diodore au 4. liure, Pline, Solin, & Albert le grand, lesquels le Lecteur pourra voir, s'il luy plaist. Cestuy monstre est donc inuenté & expressément ainsi conformé, pour estre par le Lyon signifié le mois de Iuillet: & par la Vierge, le mois d'Aoust (ausquels deux mois le Soleil est aux signes de Leo & Virgo) durant lequel temps se fait la principale exondation & desbordement du Nil. Au demeurant, ce simulachre & vieillard representant le Nil, est chargé de seize petits enfans grauissans & grimphans sur luy, & comme se ioüans autour de luy, qui aux pieds, qui à la teste, qui au milieu du corps: par lesquels sont signifiees & entendues les seize coudees de l'accroissement en hauteur dudit fleuve, ainsi qu'a esté dit. Car l'aage d'enfance est le vray Hieroglyfique de croissance. Ainsi par ceste figure est signifiee fecondité d'agriculture & fertilité, comme aussi l'vtilité qui reuiet de la nauigation & fleuve nauigable: & par consequent la communication de beaucoup de biens aux estranges nations & loingtains prouinces.

4.

LA quatrieme figure de ceste planche est tiree du reuers d'une medalle d'argent, de Martia Otacilla femme de l'Empereur Philippus, du regne duquel & de son fils, Auguste comme luy, furent celebres les jeux Seculaires, ainsi que tesmoigne l'inscription, qui est *seculares Augustorum*, c'est à dire, Les jeux seculaires faits par les Empereurs Augustes, qui furent les deux Philippes pere & fils. Et ces quatre vnitez IIII. qui sont tout au dessous, me semblent signifier que l'animal icy figuré (dit Hippopotamus) fut monstré au

i.ij.

Comme le Nil est representé.

Sphinx.